

բաց և միացեալ ընդ գմբեթիւն և բովանդակ սահեալ ճառագայթէր ի ծայրս ծառոց նոճից և նման աղեղանց, որ յամպս երևի, փայլակնաբար ցայտէր ի ստորագրեալ քարատող և աղիւսաշատ պուրակն, ուր կայր դադարեալ Խաչն Քրիստոսի»:

«Գիտացեալ այնուհետև սրբոյ առն, եթէ յայնմ տեղուջ է գանձն անկապուտ. առնոյր ի ձեռն բրիչ, պարեգօտեալ իբրև զարին Աբրահամ, սկսանէր բրել գնկատեալ տեղին իւրով համահաւանեալ արամբն: Եւ իբրև վայրափոսէր հինգ քիլ կամ թէ աւել ինչ՝ յանկարծակի երևէր տապան մի արծաթի ժանգառագոյն հնացեալ, որ ունէր առ հասարակ Հայ, Հռոմ և Ասորի գիր և ցուցանէր ի նմա գոլ գմասն կենդանարմատ Փայտին, և կայր անդ նշանն Քրիստոսի արծաթաձոյլ գեղազանեալ ոսկի աղօտ տեսակաւ, որ յաւէտ է ի Խաչէն Քրիստոսի»:

«Ապա այնուհետև հրճուալից եղև յոլովակի խնկարկութեամբ այրն Աստուծոյ և գուարթանայր հոգեծաղիկ պայծառութեամբ, և յարակից լեալ մարմնաքնար Դաւթի երգոյն, յօրինէր նուագրս երաժշտականս «Օրհնեցից զՏէր յամենայն ժամ»: Եւ որ ի կարգին է՝ վասն շնորհելոյ երկիւղածաց իւրոց գնշանն, որ միշտ ապրեցուցանէ ի թշնամոյն: Եւ գանխաբար ընկալեալ զայն նշան փրկութեան՝ յիւրն բերէ յեկեղեցի»:

«Յաւուրան այնոսիկ յերևիլ նշանին և ի դալ հասանիլ ի հանգստարանն՝ մեծ և հրաշալի զարմացումն լինէր, զի լուել անհնարին էր գահեղ մեծ փառացն Աստուծոյ»:

«Ձի որպէս Կիւրեղ, որ յերուսաղէմ էր Հայրապետ՝ գրութեամբ առ Կոստանդիանոս վասն երևման Խաչին ասէր, թէ ցայտք լուսոյ մինչև ի Ձիթաստանեայց լեռունն ո՛չ միում կամ երկրորդում երևեալ, այլ ամենայն բազմութեան քաղաքին ակն յայտնի ցուցեալ երևէր. նոյն գունակ եղև արևելից աշխարհիս լուսոյ Խաչիս երևումն: Ձի հարթ հասարակ ամենեքին տեսանէին զսաստկութիւն լուսոյն բոցաճաճանչ փայլամբ եկեալ ընդ ամպս երկնից՝ սլացեալ յայտ յանդիման ամենեցուն ել և էջք շնորհացն ի վերայ ամենասուրբ Խաչին, երբեմն ի նմանութիւն հրոյ, երբեմն ի նմանութիւն լուսոյ, և երբեմն ի նմանութիւն աստեղն, որ ծագէ յառաւօտուն, զոր ո՛չ մեր, այլ աշխարհ ամե-